

Headlines

1 राश्ट्रीय सुरक्षा सलाहकार अजीत डोभाल होरें प्रधानमंत्री नरेंद्र मोदी हुंदे कन्नै मुलाकात कीती ऐ। केंद्री गृह सचिव गोविंद मोहन होरें सिविल डिफेंस मॉक ड्रिल अभ्यास कोला पैहले राज्यें दे मुख सचिवें कन्नै मीटिंग कीती ऐ।

2 सार्वजनिक बंड बिक्री सरिस्ते दे दायरे च बाद्दा कीता गेआ ऐ। मंत्री सतीश शर्मा होरें आखेआ ऐ जे नाबालिगें, विदवाएं, बेसहाराएं ते तलाकशुदाएं गी परौआर राशन कार्डें च शामिल कीता जाग।

3 सरकार नै मुख्य भरै च शिड़क हादसे दे पीड़ितें लेई बिजन नकदी आहले ईलाज सरबन्धी योजना गी अधिसूचित करी दित्ता ऐ।

4 जम्मू-कश्मीर च भारत-पाकिस्तान अंतरराश्ट्री बन्ने पर तनाऽ दे बिच्च करसाने तौले-तौले फसल दी बाड़ी दा कम्म मका करदे ना।

5 ते पुंछ कब्जा रेखा कोल पाकिस्तानी घुसपैठिये गी गिरफ्तार करी लैता गेआ ऐ।

<><><><><><>

PM-NSA

पहलगाम आतंकी हमले मगरा उच्च स्तरीय बैठकें दे चलदे नमीं दिल्ली च राश्ट्रीय सुरक्षा सलाहकार अजीत डोभाल होरें प्रधानमंत्री नरेंद्र मोदी हुंदे कन्नै उन्दे आवास पर मलाटी कीती। रक्षा सचिव राजेश कुमार सिंह होरें कल प्रधानमंत्री हुंदे कन्नै मलाटी कीती ही। एहदे थवां पैहले वायु सेना प्रमुख एयर चीफ मार्शल अमरप्रीत सिंह होरें बी प्रधानमंत्री हुंदे कन्नै बैठक लाई। नौसेना प्रमुख एडमिरल दिनेश के. त्रिपाठी ते सेना प्रमुख जनरल उपेंद्र द्विवेदी हुंदे कन्नै बक्ख-बक्ख बैठक लाई। तोआई, केंद्री गृह सचिव गोविंद मोहन होरें कल होने आहली नागरिक सुरक्षा मॉक ड्रिल दी तैयारिएं दी समीक्षा करने लेई राज्यें ते केंद्र शासित प्रदेशें दे मुख सचिवें कन्नै वीडियो कांफ्रेंस राएं बैठक लाई। गृह मंत्रालय कार्यालय च होई दी बैठक च नागरिक सुरक्षा दे महानिदेशक, राश्ट्रीय आपदा मोचन बल एन.डी.आर.एफ दे महानिदेशक ते होर दुए वरिष्ठ अधिकारी शामिल होए।

<><><><><><>

PDS-Coverage

समूलचे जम्मू-कश्मीर च खुराक, सुरक्षा सरिस्ते गी निगगर बनाने दे मकसद कन्नै खुराक, सिविल सप्लाई ते उपभोक्ता मामले जम्मू-कश्मीर सरकार नै सार्वजनिक बंड बिक्री सरिस्ते तैहत उन्नत समावेशी उपाऽ कीते ना। उपभोक्ता, सिविल सप्लाई ते खुराक मंत्री सतीश शर्मा होरें एहदे बारै जानकारी दिती।

<><><><><><>

Cashless-Treatment

सरकार नै मुख्य भरै च शिड़क हादसें दे पीड़ितें लेई बिजन नगदी आहले ईलाज सरबंधी योजना गी अधिसूचित करी दिता ऐ। इस योजना दे तैहत पीड़ित गी बहोबद्द डेढ लक्ख रपे तोड़ी दे इलाज दी सहूलत उपलब्ध होई जाग। शिड़क, ट्रांसपोर्ट ते जरनैली शिड़कें सरबंधी मंत्रालय आसेआ जारी इक्क गजट अधिसूचना मताबक एहू स्कीम 5 मई 2025 सवां लागू होई जाग। मोटर गड्डी दा इस्तेमाल करदे होई शिड़क हादसे दे शिकार होने आहला कोई बी व्यक्ति इस योजना तैहत बिजन नकदी पैहें दे ईलाज कराने दा हकदार होई जाग।

<><><><><><>

IWT-Supervisor

सरकार आसेआ पाकिस्तान कन्नै सिंधू पानी संधि दे कई सरिस्ते गी मुअत्तल करने सरबंधी लैते गेदे हाल दे फैसलें दा समूलचे रियासी जिले दे मुकामी लोकें तगरा समर्थन कीता ऐ। चिनाब नदी इलाके च पानी दा इक्क मुख् साधन ऐ। पिछले किश हफ्ते सवां पानी दा स्तर घट्ट होई गेदा ऐ। पानी दा स्तर घट्टने कन्नै करसानें ते मुकामी बसनीकें गी चैंता बनी गेदी ही जेड़े राई-बाई ते रोजाना दे इस्तेमाल लेई नदी दे पानी पर निर्भर ना। घट्ट बहाव गी मौजूदा संधि बवस्था तैहत नियंत्रित बहाव दे खलाफ अकुशलता कन्नै जोड़ेआ जा करदा ऐ। इस निलंबन गी ना छड़ा इक्क रणनीतिक कूटनीतिक गैंऽ दे तौरा पर दिक्खेआ जा करदा ऐ, सगुआं मकामी विकास ते संसाधन सुरक्षा गी पैहल देने दे आह्वान दे तौर पर दिक्खेआ जा करदा ऐ।

<><><><><><>

Accident

पुंछ जिले दी मेंढर तैहसील दे घानी इजाके च इक बस हादसे च 4 जनें दी मौत होई गई ऐ ते 46 दुए दे घायल होने दी खबर ऐ। जानकारी मूजब एहू हादसा असलै पेश आया जिसलै इक यात्री बस सड़कै परा रूलकियै हेठ इक खड्डे च जाई पेई। हादसे दे तुरत बाद बचाहू अभियान शुरू कीता गेआ। पुलसै मामाला दर्ज करियै हादसे दे कारणे दी जांच शुरु करी दित्ती ऐ। शुरुआती जानकारी मूजब एहू हादसा डरैवर दे गड्डी पर काबू नेई रौहने कारण पेश आया ऐ। उपराज्यपाल मनोज सिन्हा ते मुख्मन्त्री उमर अब्दुल्ला होरें इस हादसे पर दुख जताया ऐ। जल शक्ति मंत्री जावेद अहमद राणा होरें हादसे पर दुख जाहिर कीता। उनें हादसे च घायल लोकें कन्नै अस्पताल जाइयै मलाटी कीती ते उन्दी ढोल पुच्छी।

<><><><><><>

JK-Farmers

जम्मू-कश्मीर च भारत पाकिस्तान अंतरराष्ट्रीय बन्ने कन्नै लगदे इलाके च रौहने आहले करसान पहलगाम आतंकवादी हमले मगरा बदे दे तनाऽ दे चलदे फसले दी बाड्डी करने आस्तै सख्त मेहनत करा रदे न। आकाशवाणी जम्मू संवाददाता दी रिपोर्ट मूजब जम्मू, साम्बा ते कठुआ इनें त्रों जिले च तकरीबन 1 लक्ख 25 ज्हार हेक्टेयर राई-बाई आहली जमीन पाकिस्तान कन्नै लगदे इलाके च ऐ। त्रेवा, म्हाशें दे कोठे, चंदू चक्क, घराना, बुल्ला चक्क ते कोरोटाना कलां च करसान दिन रातीं लम्मे पर लगगे देन ते बाड्डी करा रदे न तां जे पूरे कम्मे गी खत्म करी लैता जा ते फसले गी थाहरें सिर पजाया जाई सकै।

<><><><><><>

Pak-Intruder

पुंछ जिले आहली कब्जा रेखा कन्नै लगदे इलाके च सुरक्षाबले इक पाकिस्तानी घुसपैठिए गी गिरफ्तार कीता ऐ। एहदी उमर 20-25 बरे बश्कार दस्सी जा'रदी ऐ। सुरक्षाबले इसी कब्जा रेखा कश इत्त भेठा घुसपैठ करदे फगड़ेआ। अगड़ी पुच्छ-पड़ताल लेई हिरासत च लैता गेआ ऐ।

<><><><><><>

CS-IT

मुख्य सचिव अटल डुल्लू होरें जम्मू कश्मीर दे सब्बने सरकारी मैहकमे च भास्कराचार्य नेशनल इंस्टीच्यूट फॉर स्पेस एप्लीकेशनस एंड जियो इंफोमेटिक्स दा सैह्योग कन्नै शुरू कीती गेदिएं सूचना प्रौद्योगिकी सरबंधर पैहलकदमिएं दी स्थिति दी समीक्षा कीती। इस दरान उनें लोकें गी बेहतर ढंगै सिर सेवां सुविधा उपलब्ध कराने लेई अपनाई गेदिएं आई.टी आधारित पैहलकदमिएं दे बारे च तफसीली जानकारी हासल कीती। उनें BISAG-N दा सरकार दे जतनें च सैह्योग देने लेई आभार बी प्रकट कीता।

<><><><><><>

DC-Reasi

रियासी दिएं डिप्टी कमीशनर निधि मलिक होरें दिल्ली अमृतसर कटड़ा एक्सप्रेस वे पर जारी कम्मै दी प्रगति दा जायजा लैने लेई कल राष्ट्रीय जनरैली शिड़क सरबन्धी भारतीय प्राधिकरण एनएचएआई दे अफसरें ते सरबन्धत होरने धड़ें दे प्रतिनिधिएं कन्नै इक बैठक लाई। डीसी होरें प्राधिकरण गी निर्देश दित्ता जे एक्सप्रेस वे दे कम्में दे चलदे पहाड़ कट्टने ते जिमीं खोदने करी जिनें मकाने च दरेड़ा ओने दी जानकारी ऐ, इत्त सरबन्धे च लोड़चदी कारवाई तौले शुरू कीती जा। उनें आखेआ जे निर्माण गतिविधिएं दरान जेहड़ा कोई बी नुकसान जां समस्या सामने औंदी ऐ ओहदी जिम्मेवारी एनएचएआई दी होग ते उसी सधेरने दा जिम्मा बी ओहदा गै होगा।

<><><><><><>

Polythene-Seizers

गैर कनूनी भंडारन ते बंदश आहला समेयान दी बंड बिक्री करने खलाफ इक्क महत्वै आहली कार्रवाई च जम्मू म्युनिसिपल कार्पोरेशन, जेएमसी नै नरवाल इलाके च तकरीबन 40 मीट्रिक टन मोमी लफाफा जब्त कीता ऐ। जेएमसी दे कमिशनर देवंश यादव हुंदी अगुवाई च एह कार्रवाई कीती गेई। राजीव नगर रोड कोल इक्क गोदाम च मोमी लफाफें कन्नै भरोचे दा इक्क ट्रक फगड़ी लैता गेआ। छापे दौरान टीम नै गुटखे दा बड्डा भंडार बी जब्त कीता। जेएमसी दे कमिशनर यादव होरें आखेआ जे जब्त कीता गेदा पालिथीन इक्क बारी बरतोने आहली प्लास्टिक ऐ जेदे पर बंदश लगगी दी ऐ।

<><><><><><>

PMAY-Training

प्रधानमंत्री आवास योजना-शैहरी 2.0 तैहत् औंदे घर-घर सर्वेक्षण गी सुविधाजनक बनाने लेई कल साम्बा, उधमपुर ते राजौरी जिले च सुपरवाइजरें ते सर्वेक्षकें लेई इक दिनै दा सिखलाई कार्यक्रम करोआया गेआ। साम्बा, उधमपुर ते राजौरी जिलें च कार्यक्रम दा आयोजन अतिरिक्त जिला विकास कमिशनर ते नोडल अफसरें जिंदे च चम्पा देवी ठाकुर, राजिंद्र सिंह ते डॉक्टर राज कुमार थाप हुंदी दिक्ख-रिक्ख च करोआया गेआ। इस कार्यक्रम दा मकसद शैहरी इलाकें च उन्दे सर्वेक्षण करने लेई कर्मियें गी हुनर ते उपकरणें कन्नै लेस करना हा। इस सिखलाई कार्यक्रम च सुपरवाइजरें ते फील्ड इन्वेटीगेटरें दी खास भागीदारी दिक्खी गेई।

<><><><><><>

Gyanpath-Design

स्वतंत्रता दिवस समारोह 2025 दे हिस्से दे तौरा पर रक्षा मंत्रालय आसेआ MyGov दे सहयोग कन्नै पैहली थमां 15 मई तगर ज्ञानपथ दे डिजाइन लेई प्रतियोगिता दा आयोजन कीता जा'रदा ऐ। एहदा मकसद युवाएं ते जनता च देशभक्ति दी भावना गी बल देना ऐ। प्रतिभागियें गी लाल किले च एनसीसी कैडेटें, NSS दे स्वयंसेवकें ते स्कूलें दे बच्चें आसेआ बनाए जाने आहले फार्मेशनें गी डिजाइन करना होग। पैहले त्रौनें जेतुएं गी 10 ज्हार रपे जिसले के पहले 250 प्रतिभागियें गी ई निमंत्रण पत्र थ्होग जे ओहू अपने इक साथी कन्नै इस समारोह दे साक्षी बनी सकन।

<><><><><><>